



OE Sarsura - decisiun da prosegumaint

Davo cha la suprastanza vaiva decis in favrer 2018 da vulair cumbatter pel proget da l'ouvra electrica Sarsura s'ha laschè offrir ad üna firma specialisada per scriver oura l'incumbenza in GU o in TU. La suprastanza ha decis chi haja da gnir fat divers sclerimaints pro'l uffizi d'energia chantunal, che pussibilitats chi detta per privatisar il proget e/o per as participar vi d'ün'ouvra electrica - lura privata.

Sanaziun sarinera Zernez - cuntinuaziun deruotta TTK

Inaspettadamaing es ida ruotta la terza splattütscha da quatter da la sarinera a Zernez, uschè cha be üna es amo in funcziun. I s'ha stuvü decider da trar inavant il proget da la sanaziun totala da la sarinera Zernez e da metter sül preventiv 2021 la progettaziun da detagl sco eir la preparaziun da submitsiuns.

Planisaziun refacziun vias da god - SIE 2021-2036

Per garantir üna rait da vias da god equivalenta al di dad hoz as haja fat üna planisaziun a lunga vista sur tuot il territori dal Cumün da Zernez. Las refacziuns sun gnüdas missas tenor prioritats bsögnavlas in connex cullas cultivaziuns dal god (da protecziun etc.), il mantegnimaint dals repars cunter lavinas e crappa ed implü il stadi actual da la rait da vias.

Regiun EBVM - cunvegns da prestaziun

L'organisaziun Regiun Engiadina Bassa Val Müstair ha suottamiss als singuls cumüns differents sböz da cunvegns da prestaziun per garantir inavant l'organisaziun cumünaipla da differentas prestaziuns, chi sun scrodadas e chi sun darcheu da renovar. Quai sun la cunvegna d'organisaziun da la scoula da chant e musica, la cunvegna d'organisaziun dal post d'integrasiun sco eir la cunvegna dal management regiunal NRP. La suprastanza ha sancziunà tuottas trais cunvegns.

Scoula Zernez – tablets pels uffants

In connex cul plan d'instrucziun 21 sto la scoula far adöver da mezs electronics (iPads) pels scolars. Il temp da la pandemia da corona es stat il meglder exaimpel chi ha cumprovà cha'ls iPads han portà enorm bler per l'instrucziun a distanza. La suprastanza cumünala ha deliberà ün credit supplementar da chf 25'000 per la cumpra d'ulteriurs iPads cun tastaturas e pencils.

Adattamaint urari auto da posta traget Zernez-Brail-Cinuos-chel

Cun quai cha la lingia 7, Zernez - La Punt-Chamues-ch, es gnüda separada haja dat müdamaints i'l urari dal auto da posta da la lingia Zernez-Brail-Cinuos-chel. Davo avair fat divers sclerimaints plü profuonds e necessaris s'haja pudü abinar cun l'uffizi chantunal davart tscherts adattamaints da l'urari, nomnadamaing las colliaziuns sül tren a Zernez 07.13 Engiadin'Ota e 07.36 Engiadina Bassa, sco eir la colliaziun da las 18.36 dal tren chi riva a Cinuos-chel da l'Engiadin'Ota a favur da la populaziun da la fracziun da Brail.

Sosa Gera SA, Zernez - dumonda per prodüer beton d'ürant la not e las fin d'eivnas

In connex culla fabrica dal tunnel Munt la Schera es la Sosa Gera SA in oblig da garantir la furniziun da beton e gera. La SC conceda ün permiss excepziunel per prodüer e chargiar intuorn beton d'ürant la not e las fin d'eivnas dals 01-09 fin 15-11-2020 e dals 01-09 fin 15-11-2021.

Tour de Suisse 2023 - dumonda da princip

Il Cumün da Zernez es gnü infuormà dal Cumün da La Punt-Chamues-ch, ch'els hajan deponà lur interess sco lö d'etappa per la Tour de Suisse 2023. Fingià dal 2017 d'eira La Punt-Chamues-ch lö da böt e Zernez lö da partenza. Analog a l'on 2017 füss l'arriv mità da gün. Causa la fabrica da la via maistra decida la suprastanza da refüsar la realisaziun da la Tour de Suisse 2023 a Zernez.

Prüma lectüra preventiv 2021

Ils gremis responsabels han repassà il prüm sböz dal preventiv dal quint da success e dal quint d'investiziuns per l'on 2021. La seguonda lectüra dal preventiv 2021 ha lö in october 2020.